
ՄՈՍԻԿԻ ԾՆՆԴՅԱՆ 750–ԱՄՅԱ ՀՈԲԵԼՅԱՆԻՆ
ՆՎԻՐՎԱԾ ԳԻՏԱԺՈՂՈՎ

ՀՀ ԳԱԱ արվեստի ինստիտուտի և Պետական հորեյյանական հանձնաժողովի նախաձեռնությամբ հոկտեմբերի 15-ին ՀՀ ԳԱԱ նախագահության նիստերի դահլիճում իր նիստերը գումարեց Մոմիկի ստեղծագործությանը նվիրված գիտաժողովը:

Բացման խոսքով հանդես եկավ ՀՀ ԳԱԱ արվեստի ինստիտուտի տնօրեն, արվեստագիտության դոկտոր, պրոֆեսոր Արարատ Աղասյանը՝ նշելով, որ Մոմիկի մասին առկա գրականությունը թերթելիս նկատել է, որ հետազոտողներից ոչ ոք Մոմիկին չի համեմատել իտալական Վերածննդի «կնքահայր», հանճարեղ արվեստագետ Ջոտտոյի հետ: Մինչդեռ Ջոտտոն ևս ծնվել է XIII դարի 60-ականներին (1266–1337) և Մոմիկի պես մահացել XIV դարի 30-ականներին:

Գիտաժողովի մասնակիցներին ողջունեց ՀՀ ԳԱԱ հայագիտության և հասարակական գիտությունների բաժանմունքի ակադեմիկոս քարտուղար, ակադեմիկոս Վլադիմիր Բարխուդարյանը: Ողջույնի խոսք ասաց նաև Մոմիկի ծննդյան 750-ամյակին նվիրված հորեյյանական կառավարական հանձնաժողովի անդամ, Հայաստանի ճարտարապետների միության նախագահ Մկրտիչ Մինասյանը:

Առաջին նիստը (նախագահ՝ պրոֆ. Ա. Աղասյան) սկսվեց ՀՀ ԳԱԱ արվեստի ինստիտուտի ճարտարապետության բաժնի վարիչ, ՀՀ ԳԱԱ թղթակից անդամ, ճարտարապետության դոկտոր, պրոֆեսոր Մուրադ Հասրաթյանի՝ «Մոմիկը որպես ճարտարապետ» թեմայով զեկուցումով: Բանախոսը նշեց, որ նկարիչ, քանդակագործ և ճարտարապետ Մոմիկը բացառիկ երևույթ էր միջնադարի հայ (և ոչ միայն հայ) արվեստում: Նրա ճարտարապետական ստեղծագործությունները արվեստների սինթեզի գլուխգործոցներ են, որոնց նշանակությունն անվիճելիորեն դուրս է գալիս ազգային մշակույթի շրջանակներից: Հաջորդ զեկուցմամբ հանդես եկավ ԵՊՀ մշակութաբանության ամբիոնի վարիչ, պատմական գիտությունների դոկտոր Համլետ Պետրոսյանը, որը խոսեց Մոմիկի խաչքարերի մասին: Ըստ զեկուցողի՝ Մոմիկի խաչքարերի բնութագիրը նույնական է դասական խաչքարերի բնութագրին: «Ճարտարապետը, քանդակագործն ու մանրանկարիչը հավասարաչափ արտահայտվել են այս կոթողներում՝ սլացիկ սալ, մանրամասն, ձկուն, չընդհատվող քանդակ, մարդաբանական ճշտության հասնող պատկերաքանդակ: Մոմիկի խաչքարերի էական նվաճումներից են ցանցկեն կամ աժուր բլթակները, որոնք առկա են միայն Պողոսի ու Դադիվանքի հայտնի խաչքարերում»: ՀՀ ԳԱԱ արվեստի ինստիտուտի առաջատար գիտաշխատող, ճարտարապետության դոկտոր, պրոֆեսոր Դավիթ Քերթմեճյանի զեկուցումը նվիրված էր Աղթամարի Ս. Խաչ տաճարի, Բուրթելաշենի և Նորավանքի հորինվածքների համեմատական

քննությանը: Բանախոսը մեկնաբանեց հուշարձանների կառուցման շարժառիթները և վերլուծեց դրանց պատկերային համակարգերն ու հորինվածքային կառուցվածքը: «Երկու տաճարներն էլ, որոնք ստեղծագործական որոնումներ են, նոր երանգ ավելացրեցին հայկական ճարտարապետության և համաշխարհային միջնադարի հարստություններին: Քանդակային պատկերագրությամբ Բուրթելաշենի դեպքում աղոթք է բարձրացված առ Աստված, իսկ Աղթամարի դեպքում փառաբանվում է Արծրունու թագավորության բարօրությունը՝ Աստծո բարեհաճությամբ»: Մ. Մաշտոցի անվան Մատենադարանի գիտաշխատող, արվեստագիտության թեկնածու Լիլիթ Չաքարյանը ներկայացրեց Մոմիկի մանրանկարչական ժառանգությունը՝ պահպանված Մաշտոցյան Մատենադարանի երկու ձեռագրերում: Մատենադարանի Հայ արվեստի պատմության և գրչության կենտրոնների ուսումնասիրության բաժնի վարիչ, պատմական գիտությունների դոկտոր Կարեն Մաթևոսյանի հաղորդումը նվիրված էր օրերս հրատարակված՝ «Մոմիկ» գրքի (հայերեն, անգլերեն) և «Մոմիկ-մանրանկարիչ (13-14-րդ դդ.)» ալբոմ-ուսումնասիրությանը (կազմողներ՝ Կարեն Մաթևոսյան, Լիլիթ Չաքարյան, խմբագիր՝ Հրայր Թամրազյան):

Նստաշրջանի երկրորդ նիստում (նախագահ՝ Մ. Հասրաթյան) առաջինը հանդես եկավ ՀՀ ԳԱԱ Արվեստի ինստիտուտի ավագ գիտաշխատող, Ռուսական արվեստի թանգարանի (Արա Աբրահամյանի հավաքածու) տնօրեն, ճարտարապետության թեկնածու Անուշ Տեր-Մինասյանը՝ «Արվեստների համադրումը (սինթեզը) Մոմիկի ստեղծագործություններում» բանախոսությամբ: Ջեկուցողի տեսակետի համաձայն՝ «տարբեր արվեստներին լիակատար տիրապետող Մոմիկին հաջողվել է օրգանապես միավորել դրանք մեկ գեղարվեստական բարձրարվեստ ստեղծագործության մեջ՝ որ ասպարեզին էլ այն պատկաներ: Դրա շնորհիվ նրա գործերը, բազմակողմանի ընկալվելով, մարդու վրա թողնում են ամբողջական էմոցիոնալ ներգործություն»: Արվեստի ինստիտուտի ավագ գիտաշխատող, արվեստագիտության թեկնածու Սեյրանուշ Մանուկյանի «Անվանաթերթերը Մոմիկի ծաղկած ձեռագրերում» զեկուցումը նվիրված էր Մոմիկի՝ Մ. Մաշտոցի անվան Մատենադարանում պահվող երկու՝ 1292 թ. և 1302 թ. Ավետարանների անվանաթերթերին, «որոնք իրենց հորինվածքով, զարդամոտիվներով, զարդատառերով և լուսանցազարդերով արտացոլում են Գլաձորի դպրոցի մանրանկարչության զարգացման վաղ և միջին փուլերը, կապված համապատասխանաբար Մեծ Հայքի և կիլիկյան ու բյուզանդական ավանդույթների ներթափանցման հետ»: Արվեստի ինստիտուտի ավագ գիտաշխատող, արվեստագիտության թեկնածու Ջեփյուռ Թառայանն անդրադարձավ Հայր Աստծո կերպարին Նորավանքում: ԵՊՀ դասախոս, արվեստագիտության թեկնածու Զարուհի Հակոբյանի զեկուցումը նվիրված էր XIII դարի երկրորդ կեսին և XIV դարի առաջին կեսին վայոցձորյան քանդակի բյուզանդական պատկերագրական անդրադարձներին:

Գիտաժողովի արդյունքներն ամփոփեց Ա. Աղասյանը: